

COMMUNICAZIUN A LAS MEDIAS

Claustra, ils 31 da mars 2026

Madrisa Solar surpassa las spetgas durant l'emprim enviern

L'ovra electrica alpina Madrisa Solar ha produci durant l'emprim enviern dapli energia che prognostigà. Il territori da skis Madrisa, che ha retratg la stagiun d'enviern passada per l'emprima giada electricitad da Madrisa Solar, fa medemamain ina bilantscha positiva. La segunda fasa da construcziun cumenza l'entschatta da matg. Fin il november duain var 70 pertschient da l'implant esser colliads cun la rait.

Sco emprim implant alpin d'energia solara da la Svizra ha Madrisa Solar furnì a partir dal settember 2025 electricitad per la rait. Cura che l'emprima naiv è vegnida, eran francadas en il terren var 1'000 maisas solaras e montads radund 6'000 moduls solars bifacials. Da quels èn circa 3'600 stads en funcziun durant l'emprim enviern. Quai corresponda a radund 20 pertschient da l'entir implant planisà.

Il facit è positiv: Cun ina prestaziun da bundant dus megawatt ha l'implant en il Partenz produci durant l'emprim semester d'enviern da l'october fin il mars var 1,5 gigawatt electricitad - ed uschia dapli energia che spetgà. L'implant electric Madrisa Solar sa chatta sin 2'000 meters sur mar ed è concepì consequentamain per producir ina gronda quantitat d'electricitad durant l'enviern. Sunter l'emprima naiv è la prestaziun creschida per var 15 pertschient grazia a l'effect d'Albedo e grazia als moduls solars bifacials che produceschan da tuttas duas varts electricitad e nizzegian era la glisch reflectada.

Uschia ademplescha Madrisa Solar durant l'emprim enviern cleramain la quantitat minimala pretendida da Solarexpress da 500 uras kilowatt per kilowatt installà.

Current solar per las pendicularas da Madrisa

La patruna da construcziun da l'implant solar alpin sur Claustra Vitg è la Madrisa Solar AG. A la societad èn participads per mintgamai in terz Repower, las Ovras electricas da Turitg EKZ e la vischnanca da Claustra.

L'electricitad producida sin il territori da Madrisa vegn nizzegiada da las Ovras electricas da Turitg e da las pendicularas da Claustra-Madrise. Grazia a la messa en funcziun parziala da Madrisa Solar il settember passà en cumbinaziun cun ils agens implants solars da las pendicularas èsi stà pussaivel da generar considerablmain dapli energia che necessari per il manaschi durant l'entira stagiun d'enviern.

La pli gronda etappa da construcziun cumenza il matg

L'entschatta da matg cumenza probablmain la segunda ed a medem temp la pli gronda etappa

da construcziun dal project Madrisa Solar. A la fin da la proxima etappa duain circa 70 pertschient da l'implant esser colliads cun la rait. L'implant duai vegnir mess en funcziun dal tuttafatg la fin dal 2027.

Per planisar e realisar il project Madrisa Solar collavura la societad per gronda part cun interpresas da la regiun.

Contacts

Repower AG
post da medias
t +41 81 423 77 00
medien@repower.com

EKZ
post da medias
t +41 58 359 52 55
medienstelle@ekz.ch

Vischnanca da Claustra
post da medias
t +41 80 423 36 02
michael.fischer@gemeindeklosters.ch

Repower

L'interpresa Repower è dapi 120 onns activa sco producenta d'electricitad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valurisaziun da l'electricitad, da la produenziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricitad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.

EKZ

Las Ovras electricas dal chantun da Turitg EKZ èn ina da las furnituras d'energia las pli grondas da la Svizra e providedan var in milliun umans a moda fidada cun forza electrica regenerabla per 100 pertschient. Las var 1570 collavuraturas e collavuraturs da la gruppa EKZ s'engaschan per in avegnir energetic persistent: cun amplifitgar l'energia eolica, idraulica e solara e cun porscher tecnologias smartas sco pussaivladads da chargiar per l'electromobilitad. Las EKZ planiseschan, construeschan e mantegnan ina rait electrica da prest 17 000 kilometers lunghezza ch'è disponibla surproporzionalmain cun 99,998 pertschient. Da la clientella da las EKZ fan part personas privatas, interpresas ed autras furnituras d'energia svizras. Sco ina da las interpresas d'emprendissadi las pli grondas en il chantun da Turitg scoleschan las EKZ 155 spezialistas e spezialists en diesch professiuns cun emprendissadi.